

EXPO 'LENS DI MI WOWONAN' DEN SU DI DIESNUEBE EDICION

27 August, 2024, 7:00 pm

Luna di september den porta y esey ta luna di Celebracion di Dia di Prensa, celebra dia prome di luna. Un di e eventonan cu ta tuma luga ta e exposicion di Lens di mi Wowonan, organisa pa e fotografo y camarografo Leo Vrolijk.

E aña aki e exposicion ta dedica na 75 aña di Biblioteca Nacional, Fundacion Rancho Aruba celebrando 200 aña di Oranjestad. Tambe ta dedic'e na e siguiente fotografonan: Farrah Boekhoudt cu tin 25 aña den prensa, Marianellys Elena Ortiz Nava Berry cu tambe tin 25 aña den prensa y tambe Hubert de Cuba celebrando 15 aña den prensa.



Manera ta e caso den e ultimo añanan, lo otorga tambe Premio Djspie Franken cual ta dedica Joshua Bryson.

Apertura di e expo ta dialuna 2 di september na Biblioteca Nacional na Playa pa 7:00pm. E expo lo sigui te cu diabierna 27 di september, durante oranan cu Biblioteca ta habri.

HISTORIA

Leo a conta un poco di e exposicion aki, for di su comienso 22 aña pasa, tempo cu Alida Martines tabata traha riba un proyecto. Pero no tabatin idea di con pa cuminsa cu ne, ya cu nan tabata sa cu e lo costa placa. Y tabata Alida tabata esun cu a bin cu e idea di yam'e 'Lens di Mi Wowonan'.

Via un otro colega di prensa, el a bin tende cu RBC Royal Bank ta buscando un proyecto di prensa pa sponsor. Y desde e prome exposicion, RBC Royal Bank semper a para tras di e proyecto aki.

E exposicion aki ta gratis y lo ta den e sala grandi di Biblioteca Nacional. Apertura di e exposicion lo ta dia 2 di september. Normalmente ta habri e exposicion dia 30 of 31 di augustus, pero door cu 1 di september cu ta Dia di Prensa, e aña aki ta habrie dia 2 di september.



POTRET

Mas aleu, Vrolijk a splica cu normalmente e ta manda pidi, manda recordatorio, pidi potret te ora cu e haya mayoria di e hendenan. Si e por bisa cu e trabou di fotograf a bira menos, no ta tur corant tin fotograf mas.

RBC Royal Bank

Pa hopi aña caba cu RBC Royal Bank ta colabora cu e iniciativa aki 'E Lens di Mi Wowonan', Pierre Rafini, Vice-president Business Banking Dutch Caribbean y Country Manager Aruba for RBC Royal Bank, a cuminsa na bisa. Di e manera aki, riba Dia di Prensa ta conmemora e trabou importante y impactante di e miembronan di prensa y di media aki na Aruba.

Prensa tin un funcion fundamental pa mantene comunidad bon informa riba locual ta sosode riba nos isla y rond mundo. E trabou di prensa no ta uno facil. E ta exige hopi curashi, profesionalismo, precision y dedicacion. For di e prome dia, RBC ta e sponsor principal di e proyecto aki. E exposicion ta e muestra di profesionalismo y dedicacion di e miembronan di prensa.

RBC Royal Bank ta spera di por sigui contribui cu e bunita proyecto aki.